

## 1 Yóni

*Ísu wíyómpa'a iyówana Yóni Ísuni kísau-waasi kaumbo-wáái-áátáiyá'íyo miyáumai-aatai maisuwéna maanáái agaimái tímakaiye. Tuwímbai karo'-áái simátimesa sésa Ísu Maníkón-ááninko póna waási-úramba ímba ú'mai méraiye sésa fí'on-karo'-aaiwara'a simátíma'maesa núwana Yóni iséna miwítí imáyáa arupíse uwátinkanæ séna maanáái agaimái mátimakaiye.*

*Maníkóní imáyáamo aráásímíwain-ai.*

<sup>1</sup> Ísu Káráisiti Maníkóní imáyáa aráásímíwaisaama póna waási aúí'a úmai maé'mae'a iyawini áwáugon-iye. Minááisáfé'a maanáúfái agaimái kentópa'a tuwáúnana wéwiye. Áwáura'a maramá ímba wéronka'a wemá maé'éimba ánaænka'a marapá'á kuména keséta mérowata súranta awánamai kawé'á éta wenáái iséta siyáántamba aneté ta'ótokaumne.

<sup>2</sup> Aúí'a úmai maé'mae'a iyawini áwáugo afowámpá'á maé'éimba marapá'á kuména keséta mérowata awánareta póta minááisá wésimatimune.

<sup>3</sup> Kesáá Maníkóe ááninko Ísu Káráisitiye'a kááísamaisa méraumne. Awánaraundawe ísaraundawe kembiwíwára'á simátimunda póta Maníkóe ááninkoe'a kááísamaisa méraundantemba kembiwí miyá ónááwe.

<sup>4</sup> Kentáásirumba kawé'-úmai óraa'a uwásinkaindasafe'a maanáúfái agai-timúne.

*Maníkó sámó kaiwáíní áwáugon-*aai*.*

5 Maníkón-ááninko simásímakain-*aaisa* simátimeta sêta Maníkó sámó kaiwáíní áwáuma póna kumeu'ó in-tántáá'á wempimbá ímba wéraiye.

6 Miyáumai kumeu'ó in-áémpá'á méraamba Maníkóe'a kááisamaisa méraumnemo sewí karo'á sésa érai'-*aaigoni* áwáufimba ímba méraawe.

7 Énifo Maníkó sámó kain-áémpá'ó méraintemba miyáumai sámó kain-áémpá'ó méraundasa wení waásiseta kááisamaisa méraumne. Miyáumai Maníkón-ááninko Ísuma kentáásáféna imáyáa éna kumpuwúwana wení naaegó kuména póna kentáásí sáwí-*imayaa* maisíyu'*maenasa* wéiyiye.

8 Kempintá sáwí-*imayaa* ímba wéraiyesaamo súndasa kesirumpin-káró'-*ááísá* súnana Maníkóni érai'-*aaigo* kesirumpintá ímba wéraiye.

9 Afora'ó Maníkómpátáámó sáwí-*imayaasafetaamo* simáménanasaamo éna Maníkó kentáásí sáwí-*imayaa* maisiyuwénasa seyaafá-sáwí-*ímáyáá* arupísesa uwásinkainiye. Maníkó wemó siyáintemba miyá éna miyáumai kawé'-*aantemba* éna póna sáwí-*imayaa* maisiyuwénasa arupísesa wéuwasinkaiye.

10 Maníkó sêna seyaafá'*nánká* sáwí'a uráawemo simbánifo kesáámá sêta ímba sáwí'a úne sêta Maníkó karo'-*áái* siyé súnana Maníkóni ásé-*aaigo* ímba sirumpintá wéwaiye.

## 2

*Karáísiti seyaafá'nánká áfombo faisínkain-*aai*.*

1 Kesí iyámpóisono. Ímba sáwí'a iyantafe'a maanáái aúfáifimba agai-timúne. Énifo sáwí'o íyanamo éna áfombo faisínkáíwaisa ména kesifompátá áísai íníye. Wemá Ísu Káráísiti arupísemo iwáísá kesifompátá áísai íníye.

2 Sáwítaamo uráunda-meyamba kentááfá'á ímba tíno séna maimaéna pukáíye. Ímba kentáási sáwí-meyan-aantembanifo seyaafá'-wáásítí sáwí-meyankwara'a maitiyuwáíndasafena pukáíye.

3 Maníkón-aaimo taawiyafétaamo únda érai'a weséta kááisamaisa méraumnesa súne.

4 Maníkón-aaimo ímbo taawiyáfónka'o ombá Maníkóe'a kááisamai méraumnemo sembá karo'á sewaná miwífimbá Maníkóní érai'-aai ímba wéraíye.

5-6 Énifo Maníkón-aaimo taawiyáfówi Maníkómpá'á tirumbá áma'mai kawé'á wéowe. Kesáámó Maníkóe'a kááisamaisa méraumnesaamo súndawisa Ísu Káráísitimo méraintemba kesáá miyásá úmáisa ménaumne. Miyásáámó únda érai'a Maníkóe'a kááisamaisa méraumnesa súne.

*Ááéraan-amaankoma aúí'o uráin-aaí.*

7 Kesí waási isáaro. Kemó agaúnda ímba aú-amaamban-ifo ááéraan-amaamba agai-timúne. Aifa'ó simátímakaamba é'a isaraan-amaamba agai-timúne.

8 Énifo kumeu'ó in-tántáá'á áwiyo'wisana érai'a sámó kain-tántáá'á wépaape-ímba póna ááéraan-amaamba aúí'a úmai wépaape-íye. Ísu Káráísitini kísaufinkemba minámáámbá paápé

uréna kempínkwará'á minamáámbá wépaape-  
iye.

<sup>9</sup> Kentí waásimo tiyámbo uwátínkáámbanifo sámó kain-áémpá'á méraumnemo semba sámó kain-áémpá'á ímba méraafo kumeu'ó in-áémpá'á paaí méraawe.

<sup>10</sup> Énifo kentí waásimo tirumbó tíméwi sámó kain-áémpá'á méraamba pósa miwífimbá sawí-tántaa'a ímba wéraimba pósa fí'owi tuwánésa sawí-ampa'a ímba wégowe.

<sup>11</sup> Énifo kentí waásisafesamo tiyámbo uwátínkááwi miwí kumeu'ó in-áémpá'á méraawana kumeu'ó in-tántáákó túrampa'a kumeu'á uwáwisasa múgu'maagu'a úmaesa wégowe.

<sup>12</sup> Kesí iyámpóisono. Kembiwísáféna Ísu Káraísiti pukáimba póna Maníkó kentí sawí-imayaa maitiyukaintafe'a kemá maanáúfái agai-timúne.

<sup>13</sup> Óraa'-waasisono. Áwáura'a maramá ímba wérowana moóráwigo maé'éimba wemá káfé'wara'a méraisa'a wení áwáuma isáántafe'a maanáúfái agai-timúne. Ifótóno. Waántáwankomba iyáákaraantafe'a maanáúfái agai-timúne.

<sup>14</sup> Iyámpóisono. Maníkó kentifo isa'á wempá'á tiyáantafe'a maanáúfái agai-timúne. Óraa'-waasisono. Áwáura'a moóráwigo maé'éimba wemá káfé'wara'a méraisa'a wení áwáuma isáántafe'a maanáúfái agai-timúne. Ifótóno. Fasi'ámai mé'a Maníkón-aaí tirumpimbá

ta'ótore'a waántáwankomba íyáákaraantafe'a maanáúfái agai-timúne.

15 Maníkómpá'ó ímbo tewimó ontembá mindásafe'a ímba aamoín-oro. Mararákén-tántáátáfé'a ímba aamoín-oro. Mararákén-tántáátáfésamo aamoimó owí Maníkóntáfésa ímba aamoín-owe.

16 Mararákén-kwáásimó owíní áwáuma ímba Maníkómpákémbá owe. Waási kentí imáyáafinkemba ésa fí'owiti moparáwímbá túraniyamba tuwésa túwí'a maimaé iyésamo ombá ímba Maníkómpákémbá ofo mararákén-ámbá wéaraqaiwaewe.

17 Mararákén-tántáá'ó tirááimo tain-tántáá'á maambárárá'á tai'áwinasa Maníkómbó arááimo táinda-i'lo on-kwáásí aasiyaasí maé'mae'a ónááwe.

*Karáísitini namuro-wáásí táái.*

18 Kesí iyámpóisono. Ánaaen-kanaa maramó tai'áínda-kanaa ampáánká'á tíniye. Ánaaemba Ísu Karáísitini namuro-wáásígó tíníyema suwa'á ísaraawe. Karáísitini namuro-wáásí sáwífa'a é'a paápé uráamba póta mindásafeta ánaaen-kanaa ampáánká'á tíníyema súné.

19 Kentááfínkémbá Karáísitini namuro-wáásí moórá-mora méresa pósa iyáfasesa paápé ésa siyuwésasa kóuraawe. Érai'lo kentáásí waásimo méronkakaa úwoi méraawaisino. Siyuwésasa kóuraantafeta ímba kentáásí waásin-owe súné.

20 Ísu Karáísiti Maníkóní ámútankomba ai'marówana kuména kentirumpimbá méraisa'a pó'a érai'-aai wéisaawe.

21 Érai'-aai ímba ísáántafe'a sé'a ímbanifo érai'-aai ísáántafe'a maanáúfái agáúmne. Érai'-aaifinkemba karo'-áái ímba paapé isa'á ísáántafe'a maanáúfái agai-timúne.

22 Óraa-karo'o sen-kwáásí maarán-kwáásín-owe. Ísu Káráisitintafesa Maníkó ímba íyáfasinankaraiwain-iyé sen-kwáásí ésa Ísu Káráisitini namuro-wáásí-í'a ésa Maníkónté ááninkonte'a tínaaeni'a wéuwatimewe.

23 Maníkón-ááninkomba tínaaeni'a uwámewi afowánkwará'á miyá ombánifo Ísu Káráisitintafesa Maníkón-ááninkon-iyé sewí ááninkonte afowántépa'a kááisamai méraawe.

24 Ísun-aaimo aifa'ó ísaraan-aai tirumpimbá fasi'ámai ta'ótóráámba ímba ifátuwe'a miyáumai Maníkónté ááninkontepa'a kááisamai maé'mae'a oro.

25 Maarán-áái Ísu Káráisiti óraaka simásimenasa séna auí'a úmai maé'mae'a íyani'a uwátinkaumnesa simásímakaiye.

26 Karo'-áái simátínkáafo sé'a maanáúfái agaimái timúne.

27 Karo'-áái simátiyuwaawi ombánifo Ísu Káráisiti Maníkóní ámútamba tirumpimbá tínkaraimba póna maé'mae'a éna ímba karo'-áái simátimena érai'-aai wésimatimiye. Miyámó simátímísa'o ombá érai'-aaiye karo'-ááiye tuwínkaa'a owe. Simátímíntemba miyá é'a Ísu Káráisitiye'a kááisamai méraawe.

28 Kesí iyámpóísono. Wesé'a kááisamai

méraamba pò'a Ísu Káráísiti kumíndara'a wenaúranka'a ímba tigesáfé'a é'a úwoi fasi'ámai ménawa.

<sup>29</sup> Ísu Káráísiti arupíse úmai mérain-aaí é'a ísaraawe. Moóra-aiwara'a ísáaro. Miyáumai arupíse úmai méraawi érai'a Maníkóní iyámpóin-owe.

### 3

#### *Maníkóní iyámpóí-táái.*

<sup>1</sup> Maníkó arumbá óraaka'á wésimiye. Mindásafe'a imáyáan-oro. Maníkó aruntá siménasaam-pona kentáásáféna kesí iyámpóin-owe wésiye. Kesáá érai'a wení iyámpóisa úne. Maníkómpá'á ímba tiyáawi Maníkóní áwáuma ímba awánésa kentáásí áwáuwara'a ímba suwánaawe.

<sup>2</sup> Kesí waáisono. Káfé'a Maníkóní iyámpóí-i'a úmáis méraundasa ánaaemba nóra waáisawa ménaumno. Mináái ímba ísaraundanifo moóra-aimo ísaraunda simátimenaumne. Ísu Káráísiti kumíndara'a kawé'-úmai awánaandasa póta wenkááníta úmáis ménaumne. Miyán-áái ísaraumne.

<sup>3</sup> Mináái isésamo amu'maráawi Káráísiti arupísemo úmáimo méraintemba arupíse úmai méraafo káráwiyoro.

<sup>4</sup> Sáwí-imayaamo ombá isaná áamáambo taráísomba isaná minkáé-tántáákó mimbóráí'a iye. Miyáumai

sáwí-imayaamo owí Maníkóní áamáamba tínaaeni'a uwámesa taráísomba póna miyámó on-ánóndáá miwífímbá wéiniye.

<sup>5</sup> Ísu Káráisiti waásiti sáwí-imayaa maitiyuwáíndasafena marapá'á kunkáimba wempímbá sáwí-imayaa ímba wéraiye-aai é'a ísaraawe.

<sup>6</sup> Miyáumai Ísu Káráisitije'o kááisamai méraawi miwífimbá ímba sáwí-imayaa waé'wae'a ifo sáwí-imayaa waé'wae'a iwái Káráisitimpa'a ímba tésa wenáái ímba ísááwe.

<sup>7</sup> Kesí iyámpóisono. Karo'-áái simátínkáafo sé'a káráwiyoro. Káráisiti arupíse úmai méraiwai wemó intembó miyámó úmae'o iyówi arupísemo on-kwáásín-owe.

<sup>8</sup> Áwáura'a waántáwanko sáwí'a uréna miyá úmae iyéna káfé'wara'a miyá wéiye. Sáwí'o úmaesamo iyówi waántáwankoni waásín-owe. Waántáwankoni kísau tai'ásuwainkwae séna Maníkó ááninkomba ai'marówana marapá'á kunkáiye.

<sup>9</sup> Maníkóni iyámpóí pósa Maníkóni fasi'aénkó miwífimbá wérintafesa pósa ímba sáwí'a úmaesa wéiyowe. Maníkóni fasi'aén-iyámpóísómbá pósa ímba sáwí'a úmaesa wéiyowe.

<sup>10</sup> Ímbo arupísemo úmimo méraawi ímba Maníkóni iyámpóín-owe. Kentí waásimo tirumbó ímbo tíméwi ímba Maníkóni iyámpóín-owe. Miyáumaisa Maníkóni waásiye waántáwankoni waásiye tuwímbaisa ísaraumne.

*Moórá-mora tirumbó tímén-aai.*

<sup>11</sup> Moórá-mora tirumbá tíméro-aai ááéma ísaraawe.



<sup>12</sup> Ándámun-ááninkon-awi'a Kénimo uráintemba ímba miyán-oro. Kéni waántáwankon-áráá'a póna áfákomba tufúwana pukáimba maarásáféna tufúwana pukáiyé. Áfáko kawé'-ímáyáá mérowana Kéni sáwí-imayaa úmai ména póna áfákomba tufúwana pukáiyé.

<sup>13</sup> Miyaráán-úmai Maníkómpá'á ímbo tiyáawi kempímbá tirumbá sáwí'a uwátinkaiyantafena ímba táá'a íno.

<sup>14</sup> Maníkóni akúmbá sirumbá timúndasafeta séta Maníkóni némpa'a méraandasaawini áwáuma tuwéta kawé'-úmáimo méraandasaawini áwáura'a taméraumnesa sune. Kentí waási tirumbá ímbo tíméwi Maníkóni némpa'a paái méraawe.

<sup>15</sup> Kentí waásimo tiyámbo uwátínkáán-kwaasi tínkamiyasa puwíyan-kwaasin-owe. Miyámó owí aúí'ó úmáimo maé'mae'ó owíní áwáura'a ímba méraawe.

<sup>16</sup> Ísu Káráísiti arumbá siménasa ímba úwoi méraimba súwa'nai índasafena kentáásáfénawe séna pukáiyé. Miyámó uráintafeta arumbá símakaiyesa sune. Maníkóni akúmbá túwa'nai eta puwúnafo ímba sendasá úwoi túwa'naisa ónaumne.

<sup>17</sup> Óntawara'-waasi kentí waási tómbó ímbo makáawi tuwánésa ímba túwa'nai ombá sésa Maníkómbá sirumbá amúne sembá karo'á sewé.

<sup>18</sup> Kesí iyámpóisono. Sirumbá timúnemo sembá ímba tóikakemba sé'a érai'a tirumpinkémbá sé'a túwa'nai oro.

*Maníkómpá'á fasi'ámaisaamo méraunda-aaí.*

19 Sirumbá timétaamo túwa'nai úndasa miyámó únda-waasisa arupíse úmaisa méraumne. Miyámó únda Maníkón-aúrankata fasi'ámaisa méraumne.

20 Énifo kesáá sáwí'o úndasafenasa kentáásirunko umbaí taifo Maníkó seyaafá-tántáá'á awánéna minúbáí-tántáákómbá iyáákaisata Maníkón-aúrankata fasi'ámaisa méraumne.

21 Kesí waásisono. Mindásafeta imáyáa úndasa kentáásirunko ímba umbaí taisatá Maníkón-aúrankata fasi'ámaisa méraumne.

22 Wenáái taawiyafétaawe wemó aamoimó índa-i'a úndasafetaawe áisai únda-tantaa'a úwoisa wésimiye.

23 Maníkó óraaka séna kesááninko Ísu Káráísitin-awika'a timankúnkúmba é'a seyaafá'-wáásífímbá tirumbá timé'a méraaro siyáimba mináái Ísu Káráísiti óraaka simásímakaiye.

24 Maníkón-aai taawiyáfówi Maníkóe'a kááísamai méraawana miwísé'a kááísamai méraiye. Maníkó wení ámútamba ai'marówana sirumpintá kumbéna simásimenasa séna Maníkó kesé'a kááísamai méraiye sisatá wéisaumne.

## 4

### *Érai'-amutankonte karo'-ámútánkónté-taai.*

1 Kesí waásisono. Sáwífa'-waasi karo'-ámáámbá simátíma'maesa nésa Maníkóní ámútanko ke-sirumpimbá méraiye mo sembá ímba ááéma érai'e seró. Miyámó sentáfé'a miwí tirumpimbá mérain-amutamba Maníkóní ámútana'i fí'owani ámútana'iyo mindá awáné'a mináái ísáaro.

<sup>2</sup> Ísu Káráísiti Maníkóe ména marapá'á waási kunúkaiye sewí miwí tirumpimbá Maníkóní ámútanko méraiye. Minááímó sewa'ó isáamba Maníkóní ámútankoma miwífimbá méraiye seró.

<sup>3</sup> Ísu Káráisitintafesa minááímó ímbo sewí miwí tirumpimbá mérain-amutanko ímba Maníkóní ámútankon-ifo mindá Káráisitini namuro-wáásigóní ámútankon-iye. Káráisitini namuro-wáásigó tinda-aai ísaraamba isaná marapá'á méraiye.

<sup>4</sup> Kesí iyámpóisono. Maníkón-aráa'a é'a karo'-amáámbó simátíméwi íyáákaraawe. Maníkóní ámútanko kentirumpimbá méraifo Maníkómpá'ó ímbo tiyáawi miwí tirumpimbá fí'on-amutanko méraiye. Maníkóní ámútanko minámútánkómbá íyáákaraiye.

<sup>5</sup> Karo'-amáámbó simátíméwi Maníkómpá'á ímbo tembá marapá'ó wérain-aai simátíméwasa marapá'-wáási miwí táái wéisaawe.

<sup>6</sup> Kesáá Maníkóní waásisa únasasa Maníkóní waási kesááisa ísááfo fí'on-kwaasi ímba Maníkóní waási pósa kesááisa ímba wéisaawe. Miyáumaisa érai'-aaimo sí-ámútánkó miwífimbá mérain-kwaasiye karo'-ááímó sí-ámútánkó mérain-kwaasiye tuwínkaa'-úmaeta wéiyune.

### *Maníkó arumbó tímín-aai.*

<sup>7</sup> Kesí waásisono. Tirumbó tíméwini áwáuma wemá Maníkó póta Maníkóní akúmbá siruntá tíméno. Tirumbá tíméwi Maníkómpá'á tésa wení waási-i'a wéowe.

8 Maníkó tirumbá tíméwini áwáuma pósa tirumbá ímba tímén-kwaasi Maníkómpá'á ímba wétewe.

9 Maníkó mimbórá-áánínkómbá ai'marówana marapá'á kumbéna kentáásáfénawe séna puwéna aúí'a úmai maé'mae'o ondasáfénasa puwéna arumbá símakainta póna miyá uráiyé.

10 Maníkómbá siruntáámó amúndasa ímba óraata ámakaujne. Maníkó arumbá siménaşa wenááninkomba ai'marówana marapá'á kumbéna sáwí-awausaamo únda-meyamba maisiyuwáínana kentááfá'á ímba tínkwae séna pukáiyé. Miyámó uráimba Maníkó

óraa'-arumba símakaiye.

11 Kesí waásisono. Maníkó miyáumai arumbá símínta póta kentáásí waási miyáumai siruntá tíméno.

12 Waási Maníkón-ane'á ímba awánaawe. Kentáásí waási siruntá tímúndasa Maníkó keséta méraisata érai'a siruntá Maníkómbá amúne.

13 Maníkóní ámútanko kentáásirumpimba méraintafeta séta kesáá Maníkóe'a kááísamai méraunanasa Maníkó keséta kááísamai méraiyesa sune.

14 Kentáásifowa ááninkomba ai'marówana sáwí'o úmimo méraampinkemba faútinkaindasafena marapá'á kumúwata awánaraundasa simátimune.

15 Ísuntafesamo Maníkón-ááninkon-iyemo sewí Maníkóe'a kááísamai méraawana Maníkó miwísé'a kááísamai méraiye.

16 Maníkó arumbá símísata mindásafeta érai'esa sune.

Maníkó tirumbó tíméwini áwáuma Maníkó

isasá pása tirumbó tíméwi Maníkóe'a kááísamai méraawana Maníkó miwísé'a méraiye.

<sup>17</sup> Maníkó kentáá imáyáa símakaisata siruntá Maníkómbá améta póta méraundawini áwáumo sísai índa-kanaamo tíndara'a fasi'ámais ménaumne. Ísu Káráísiti wenarumbó símíntenta marapá'ó méraundarata siruntá timúndasa póta sísai índa-kanaamo tíndara'a fasi'ámais ménaumne.

<sup>18</sup> Maníkómbó tirumbó améwi ímba inkáísówe. Érai'a Maníkómbó tirumbó améwi miwífínkémbá inkaisí-ímáyáa ímba wéraiye. Sáwí'ó uráambeyantafesamo inkáísówi Maníkómbá ímba érai'a tirumbá améwe.

<sup>19</sup> Aifa'á Maníkó arumbó símakaintafeta póta siruntá amúne.

<sup>20</sup> Miwítí waásisafesa tirumbó sáwí'ó uwátínkááwa'ó ombá Maníkómbá sirumbá amúnemo sembá karo'á sewé. Miwítí waási tine'á tuwánésa tirumbá ímba tímakaawi pása Maníkón-ane'á ímba awánaawi ímba kanaa'á tirumbá améwe.

<sup>21</sup> Ísu Káráísiti óraaka séna Maníkómbá tirumbó améwi miwítí waásiwara'a tirumbá tíméro siyáíye.

## 5

### *Marapá-sáwí-kísáúgómbó iyáákaan-ai.*

<sup>1</sup> Ísuntafesa sésa Maníkó iyáfasinankaraiwai iyémó sen-ááísáfesa érai'emo sewí Manikóní iyámpóin-owe. Afowámbá tirumbá améwi ésa wení iyámpóíwara'a tirumbá améwe.

2 Maníkómbá siruntá améta wenáái taawiyaféta póta miyá úndasafeta séta Maníkóní iyámpóíwara'a siruntá timúne.

3 Maníkón-aaí taawiyafúndasa mindá Maníkómbá siruntá amúnanasa wenááigosa ínta umbaisá síyáísata póta taawiyafúne.

4 Ísumpa'a fasi'ámai kááísamai méraundasa póta marapá-sáwí-ímáyáágóntá iyáákaumne. Maníkóní iyámpói seyaafá'á kanaa'á marapá-sáwí-ímáyáágómbá iyáákaamba póna Maníkón-aaigoma ímba umbái taiyé.

5 Maarán-kwáásí marapá-sáwí-ímáyáágómbá iyáákaawe. Ísuntafesa Maníkón-ááninkon-iye sésa timankúnkúmba owí marapá-sáwí-ímáyáágómbá iyáákaawe.

*Maníkó Ísu Káráísitimbo aráátímakain-aaí.*

6 Ísu Káráísiti marapá'á kumbéna nombá maiyéna puwúwana wení naaemá kunkáíye. Nombó maíndasafena aantemba ímba kunkáíye. Nombá maiyéna puwínana wení naaemá kumíndasafena kunkáíye. Maníkóní ámútanko érai'-aaigoni áwáugo póna séna érai'e Ísu Maníkón-ááninkon-iye wésiye.

7-8 Maníkóní ámútanko siyáin-aaisafeta nombó maiyáintafeta puwúwana wení naaemá kunkáintafeta séta Ísu Maníkón-ááninkon-iye sune. Minkáúmbó-tántáá'á paápé uráintafeta mimbórá-áái séta Ísu Maníkón-ááninkon-iye sune.

9 Waásimo simátímén-aaí sewatá iséta érai'e súndasaanifo Maníkón-aaigo waási-taai

íyáákaraimba póta Maníkó ááninkontafena siyáin-aaisa ísáano.

10 Maníkón-ááninkontafesa timankúnkúmbo owí sésa Maníkó siyáintemba érai'e Ísu Maníkón-ááninkon-iyesa sune. Maníkóntáfesa ímbo timankúnkúmbo owí sésa Maníkó karo'-áái siyáiyewe. Wemá Maníkó ááninkontafena siyáin-aaisafesa ímba érai'e senkákémbá Maníkó karo'-áái siyáiyema wésewe.

11 Maníkón-ááninkoma aúí'a úmai maé'mae'a owíní áwáuman-iyewe. Maníkó imáyáasa símísata aúí'a úmai maé'mae'a wéune. Minááísá Maníkó simásímakaiye.

12 Maníkón-ááninkoe'a kááísamai méraawi aúí'a úmai maé'mae'a ofo Maníkón-ááninkoe'o ímbo kááísamai méraawi ímba aúí'a úmai maé'mae'a wéowe.

*Aúí'a úmai maé'mae'o on-áái.*

13 Maníkón-ááninkon-awitafe'a timankúnkúmbo on-kwáásí kembiwí maanáúfái agai-timúne. Aúí'a úmai maé'mae'a on-ááísáfé'a érai'e síwae sé'a maanáúfái agai-timúne.

14 Maníkómbó arááímo táínda-i'o étaamo inafinkémbó áísai úndasa kesááisa wéisaiye. Mindásafeta wenaúranka'a fasi'ámais méraumne.

15 Inaí súndasa ísáin-aaisafeta érai'-aain-iyemo súndasa maarán-ááísáfé'wara'a érai'-aai in-afinkémbá súnda-tantaa'a úwoisa símiyesa sune.

16 Kentí waásimo sáwí'o íya'o tuwáné'o é'a Maníkómpá'á áísai íyana túwa'nai ínasa Maníkóní némpa'a sáwí-aempa'a maé'mae'a iyampa'a ímba kónááwe. Tuwímbai-sawi'o owíní anondáá-meyamba Maníkóní némpa'a sáwí-aempa'a

maé'mae'a íyampa'a wíyamba mindásafe'a Maníkómpá'á áísai oro ímba súne. Tuwímbai-sawi'o owíní anondáá-meyamba ímba Maníkóní némpa'a wíyamba mindásafe'a sé'a Maníkómpá'á áísai oro súne.

<sup>17</sup> Seyaafá-sáwí'ó owíní anondáá-meyamba wéraifo tuwímbai-sawi'o owíní anondáá-meyamba Maníkó maitiyuwáínasa wení némpa'a sáwí-aempa'a maé'mae'o íyampa'a ímba miyá-sáwí'ó íya'o tuwáné'o é'a Maníkómpá'á áísai íyana túwa'nai ínasa Maníkóní némpa'a sáwí-aempa'a maé'mae'o íyampa'a ímba kónááwe.

<sup>18</sup> Maníkóní iyámpói ésa ímba sáwí'a úmaesa íyówe. Maníkón-ááninko káráwiyaisana póna waántáwanko ímba ta'ótóráísasa pósa ímba sáwí'a úmae íyówata minááísá wéisaumne.

<sup>19</sup> Waántáwanko marapá'-wáásítí óraakon-ifo kesáá Maníkóní waási éta minááísá isáúmne.

<sup>20</sup> Maníkón-ááninko kuména imáyáa símisata érai-Fasi'aenku-úrumba isatá awánáúmne. Maníkón-ááninko Ísu Káráísitiye'a kááísamaisa méraundasafeta érai-Fasi'aenkonka'a kááísamaisa méta isáúmne. Érai-Fasi'aenku-úranko éna waásisa aúí'a úmaisá maé'mae'a úndawin-ááninkon-iyé.

<sup>21</sup> Kesí iyámpóísono. Karo'-máníkómbá seyaafá'á tínaaemba uwátíméro.

*Kemá Yóni kesáái taí'áiyé.*



**Aú-aaí símai kááísamakain-aaí**  
**The New Testament in the Awiyaana language of**  
**Papua New Guinea**  
**Nupela Testamen long tokples Awiyaana**

copyright © 1984 Wycliffe Bible Translators, Inc.

Language: Awiyaana

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2013-08-17

---

PDF generated using Haiola and XeLaTeX on 18 Mar 2025 from source files dated 31 Aug 2023

0dda5aa4-c019-59cf-b9ee-e1fd4762d49c